

"QUELLO,"

In õcaxion

de

S. Çeçília

Brindixi

Fâeto õ 2 Dixembre 1928

pe-a

Banda Municipale

de Pégi



BRINDIXI

Fâeto ö 2 Dixembre 1928
pe a
Banda Municipale de Pëgi

Tra e bellesse de sto mondo,
Tanto vëgie comme neûve
Chi diverte e chi commêuve,
Ciû de tûtte, e in ogni etaê;

Primma a mûxica veddemmo
Vegnûa in prëgio in ogni parte,
E co-o fascino dell'arte
Dilettâ l'ûmanitâe.

Lê ne-i tempi i ciû remöti
A l'ha dêto vitta a' o ballo,
E ne favan do gran sciallo
Tanto i pövei comme i scioî.

E ne-a nostra bella Italia
Meistra d'arte e de poexcia,
A l'è stâeta favoria
Da-i ciû boin compoxitoî.

Perché a mûxica a fa fremme,
A l'ispira sentimento,
A-o sordatto a dà ardimento,
Se pe-a Patria o l'è ciammoû.

E pe fâ l'Italia ûnia
Co-i so' inni i ciû gagliardi,
Con Mameli e Garibaldi,
Se corriva entusiasmê.

Çitazioin mi ciû no fasso
E chi aâ Banda fõ ritorno,
Pe parlâ de. questo giorno,
Comme l'è ne-a tradizion.



Fra e ciû belle e cae demôe
Se a sto moddo dī se peû,
Çertamente a nostra banda
A-i Pëgin a ghe sta a cheû

Da qualunque parte a seûnne,
Ö ne pã quâexi ûn dovei
De corrighe sempre apprêuvo,
Pe sentîla con piaxeî.

Scicchê a nostra bella Pëgi
A se sente assâe onorâ,
De sto corpo mûxicale
Perchê o-a rende ciû stimâ.

Dīme ûn pö? Se no ghe föse
Questa Banda; cöse saê
Sta ridente çittadinn-a?
Ma ciû Pëgi o no .pariâe!...

E pe questo i mûxicanti
Noi dovemmo con amô
Ammiâ ben d'incoraggiali
Apprexali, fâghe önô.



Tûtti i anni in questo giorno
Se veddemmo chi adûnaê,
A brindâ ûn pö tûtti insemme,
Ne-a ciû gran cordialitâe.

A fã onore a sto pransetto
Innafioû con do bon vin
D'allegria pe condimento,
e di augûri senza fin.

Ansi, amixi in fin de toa
Se vorriêi ben digerî;
De maotie, de puffi e sêuxoe
Saiâ ben no discorî



Ma lasciando a parte e bûrle
In sto giorno no manchiô
De fã onore a-o Meistro Conte,
Che de çerto chî lodiô;

Pe-a costansa che o l'ha avûo
Da che a Banda a s'è formâ,
Che a toccâ i ciû belli onori
Tante votte o l'ha portâ



Tante grazie e tanti elögi
A-o sciô Morel chî faio',
Cöse o l'ha fâeto pe a Banda
Staê a senti che ve-o contiö:

In ti uffizi, in Municipio,
O l'è andâeto in sciû e in zû,
Di vantaggi ö n'ha ottegnûo
Ma ö faiâ sempre de ciû;

Perchè ö semmo gentilommo
Confidemmo tûtti in lê
Ben convinti che a sta barca
Gh'emmo ûn bûllo timonê.

O l'è chi cô-o Comitato
Misso a Pëgi pe abbellî
Questa nostra cittadinn-a
Che veddiemo rifiorî;

A studià di gren travaggi
Se mettian con grande amö,
Vegniâ Pëgi ûnn-a mâveggia,
O splendîa comme fa o sô.



Cöse diô do Prescidente?
Nostro egregio sciô Bottin;
L'è provoû che pe a Banda
O se presta ogni. pittin;

O camminn-a dappertûtto,
Ogni cösa lê o l'otten,
Cöse ö fa pe i mùxicanti
Tutti ö san; e ghe veûan ben;

Poi gh'è ö nostro Pölleghini
E peû dïlo chi ciû d'ûn,
Che pe scrive e fâ di conti
O l'è n'ommo numer'ûn.

No me scordo o Segretaio,
Sensa voeilo mette sciû ...:
Diô che n'ommo comme o Coppola
No-ô trovâe forse mai ciû.

Lêe contabile preciso,
Scröpolöso a tûtto andâ,
E nell'arte do disegno
O sa' fâse anche stimâ;

Quando pöi ö dà ö bilancio
Faêto tûtto de seû man,
Ve stupî da so chiaressa
O l'è brâo, ciû bon che o pan.



De l'amigo cao Ghigiotti
Ghe saiaê tanto da dî,
E parlâ per doî o trei giorni
Sensa manco poei finî.

Segretaio da Pro Banda
Tûtto amô pe-a Societâe,
Ö l'è là co-i sô collegghi
Tûtti pin de attivitâe.

Ö l'è amôu da tûtti a reo
Pe-ö carattere so' bon,
Questa nostra gran famiglia
A l'è tûta a so pascion.



Chi a mâe Mûsa anche ö sô grazie
A di amixi lë a vêu di,
Che a sto pranzo con noi atri
Han vosciûo anchêu vegni.

E da-o Ettore commenso
E ve diô che sotto çè
No se trêuva ûn-a personn-a
Cosci brava comme lè.

Perchè spesso pe-a boccolica
Da ommo attento o l'ha pensôu,
Da-o sêu splendido negozio
Ogni cösa o n'ha purtoû.

Cosci noî pùbblicamente
Poemo criâ ben forte ancheû:
Viva o Ettore! che a Mùxica
O ghe daiva scinn-a ò cheû.



D'atri doi vei galantommi
Mi ve vëgno ûn pö a parlâ
Che i so inviti coscî belli
Tûtti han fâeto maveggiâ;

Veuggio dïve de doe gïte,
De chi ha a muxica invtoû,
E che .sempre ricordiamo
Perche' a tûtto lö han pensoû.

Cai scignori chî de Pëgi
Piggiaê exempio da sti doi,
De ste rare e cae persone
Faêve degni imitatoî

Perche' chî bezeûgna dïlo
O Ninello e o Roncaggieû,
Han provoû che coô sö atto,
Son doi vei ommi de cheû.

Chi tralascio de fa nommi
Che tiâ a lungo no conven,
E se qualchedun me scordo
Ne parliô l'anno chi ven.



Cai amixi chi ho finio,
Viva a Banda ancheû mi crio!
ansi, Viva i mûxicanti,
che i veddiemo andando avanti,
pe e so bonn-e qualitaê,
da chi tocca, ûn pö aggiûttae;
e son certo che Brocardi
ô v'ûsia' i dovûi riguardi,
perchè a nostra cittadinn-a,
cosci bella e cosci finn-a,
a no peû restâ in derê,
de chi l'è mëno che lê.



Ûnn atr'anno se veddiemo
neûvamente, chi torniemo,
tûtti quanti in compagnia,
in salûte e in allegria,
se o scô Puppo o ne daiâ
do bon vin, do bon mangiâ;
e no vôemo che o Ninello
pigge l'ommo pe n'oxello,
chè chi drento se ghe ven
pe mangiâ e pe beive ben.



Ma de çerto sti maê versci
l'ei capii! . . . no son che schersci,
ansi, invito a comitiva

a fã insemme ûn bell'Evviva
a-o Ninello, e con raxon
scinn-a l'ûltimo garson.



Dunque, amixi, Viva a Banda!
e sta festa memoranda
tûtti noî se ricordiâ,
e brindemmo con criâ:
Viva o Meistro: i mûxicanti,
i gradii rappresentanti,
tûtti quanti son con noî,
povei, ricchi e protettoî,
Viva tûtti, i çittadin,
scia foresti che Pëgin.

QUELLO



Pûbblicôu pe cûa da Banda

